

Die Gsalzene

Mir jubiliere: Unsre Bangg gitt's 20 Joor
Doch mir hänn Altersbräschte und vrliere d'Hoor
Und nur mit Gligg isch unsre Zeedel jetzt nid läär
Denn unsrer Broschtata fällt s' Väarslibrinzie schwäär

An dr Züspa im Herbscht von letschte Joor
Hett me dr Lieblingszircher gweelt, dasch wirglogg woor
Mir hänn studiert, studiert, studiert und 's denn loo sii
Will sone Lieblingszircher fällt uns kaine ii

Me muess bi Spitzesportler – s'isch nid z'ignoriere
Keerperfunggziioone reegelmäässig kontrolliere
Liebe Jogi Löw drzue gitt's ains z'bedoone:
Dr Gruch im Schritt gheert nid zue de Keerperfunggziioone!

„Ha d' Aarbet nid erfunde, los mi gärn chauffiere
Nutz Privilegie us, due schamloos brofitiere
Mi Persönligkaiatsprofil basst yywandfrei
Fir's Offizierskorps vo dr Basler Bolizei!“

In der Sexstudie vom Bund stoot dittlig dinn
Dass mir Schwyzer spitz wie Nochbers Lumbbi sinn
Unsri Fraue sinn zwar wunderbaari Wääse
Aber Studie dien si laider kaine lääse!

Und jetzt vrzelle mir dr neyschti Fuessballglatzsch
Dr Baapscht goot schyynts biswyle an e GC-Match
Denn är isch immer deert und macht de Mensche Muet
Wo am maischte Noot und Eländ hersche duet

Wo dr Freddi Znacht vom Barfi haispaziert
Drift in dr Schlaag und är isch sofoort kollabiirt
Isch im e Horrorclown begegnet? Nai kasch dängge!
Die hänn Blakaat vo dr Frau Ackermann lo hängge!

In der Regel finde d' Männer das doch toll
Wenn e Frau said: „I wott gärn zem vierde Mool“
Doch vonre Ussnaam mien mir unverziglogg brichte
Haisst si Merkel sott me besser druff vrzichte

An dr WM gitts bald 48 Blätz
Dä Voorschlaag vo dr FIFA isch nid Lätz
So wott me Schwelleländer kimpftig integriere
Und sogar Holland kennt sich denn gwalifiziere

Und zem s'Panini-Album fyyll – das isch schreeg
Bruuchsch uff s' Huus e zwaiti Hypodeeg!
Und bim Bildli tyschle heert me d' Schieler glaage:
„Jetz bruuchi Gopferglemmi bald e Laitrewaage!“

Dr Fakir liggd uffs Nagelbrätt mit ganzem Gwicht
Dr Medizinmaa sticht sich Noodle gweer durchs Gsicht
Manager leen sich imme SM-Studio gwääle
Und d' Basler dien zem x-te Mool dr Wessels wääle!

... und dr Monschertväs

S'gitt Sache, die kasch fascht nid glaube
Die dien Dr schier dr Atem raube
D'Gschicht die duet sich widerhoole
De Amis hett me s'Hirni gstoole!

59 Millione Niete
Kaa sälschd dr Aiffeldurm nid biete
Doch letscht Novämber, s'hett uns gsträält
Hänn so vyy! Labbi dr Trump gwäält!

Zem gwinne – das hett är schnäll grafft
Bruucht är die bassend Wäälerschaft
Und das wääre im Konkrete
Rassische und Analphabetel!

Gränzdebil und ignorant
D'Eltere sinn bluetsverwandt
Zem Wääle – mir sinn drab vrschrogge
Längd dert dr IQ vomme Sogge

„Land of the brave, land of the free“
Mit dämm Slogan ischs verbyy
Drum wott au d' Änte Donald Duck
Nimm so haisse wie dä Sagg

Si Issers duet d'Lytt fasziniere
Är hett sich Hoor lo transplantiere
Dr Spänder – das isch fir uns glaar
Isch s' Fuudi vomme Dromedaar!

D' Waffelobby lacht sich schlabb
Vor Fraid goot dene dr Schuss ab
Und will dr Ku Klux Clan in fyirt
Isch d' Lyynduech-Noochfroog explodiert

Dr Kim Jong Un glatscht froo in d' Händ:
„Bin nicht mehr dümmster Presidänt!“
D' Frau Merkel duet dr Trump fescht loobe
Jetzt närve d' Amis mee als d'Schwoobe!

Ooni sich drbyy z'geniere
Loot är Dänggmööler restauriere
D' Freiheitsstatue wird uffgrüsch
Mit Minirogg und Riesebrüsch!

Ai Idee, die macht uns froo:
E Muure gege Mexico
Mir sammle drumm e Äxtra- Summe
Denn längts fir d' USA rundumme!

Dr greescht Vrlierer vo dr Waal
Haisst Bill Clinton – s'isch banal
Är hätt so gärn mit Luscht und Freud
Praggtikantine bedreut!

Und sott dr Trump mol d'Schwyz go bsueche
Duet s' Doris Leuthard lyyslig flueche:
„I nimm dr Pafferspray grad mit!“
Dä Luschtmolch längt mir nid in Schritt!“

Und zem dä Gryysel ändlogg stoppe
Goot d' Sommaruga z'Bärn go shobbe
Ains kauft si sich uff jede Fall:
Unterhoose us Metall!

Die Situation kennt eskaliere
Wie sotti d' Schwyz druff reagiere?
S' gitt nur ai Wäg us däre Noot
Die Gsalzene in Bundesroot!

Die Gsalzene findsch im Facebook